

HOBEN A ATRACA MACHI DI 60 AÑA



Louis W. ta saca e placa for di e matras.

ORANJESTAD(AAN) — Accion rapido di un guardia di seguridad a pone cu Polis por a detene e atracador.

Tabata den horanan di merdia ora cu Polis a worde notifica cu den "Oranjestraat un machi a worde atraca.

Ta asina cu e machi di 60 aña tabata cana y diripiente a worde atraca pa e hoben Fran-

cis C.

El a ranca e cartera di e machi y a core bay. Un guardia di

seguridad, kende a mira kico a pasa, a persigui e atracador kende a core drenta den un cas y a sconde e cartera.

No a dura mucho cu un patruya di Polis a presenta na e sitio y a detene e atracador den e cas.

Durante interrogacion Francis C. a gafia cu e placa cu el a horta for di e machi ta scondi bao di poco sushi.

Investigacion a indica cu e placa tabata scondi den matras

y e homber Louis W. a bay coy e placa.

Tanto Francis como Louis a keda deteni y hiba warda di Polis caminda nan a keda encarcela pendiente mas investigacion.

E machi a duna di conoce cu den su cartera e tabata tin 30 Florin. E machi tabata kier a bay coy bus pa mira su casa den hospital pero a worde ataca pa un tipo kende tabata cana pidi hende placa.

Su pretexto pa haya placa cada vez ta cu gasoline di su auto a caba. En realidad, Francis no tin ningun auto. Esnan cu no conoce mester paga bon tin ya cu e tipo aki ta un maestro den vacila pa haya placa.



Agentenan policial a detene Francis C.



Momento cu Polis ta hinca Louis den e patruya.

FTA y WAB a yega na acuerdo ayera anochi

ORANJESTAD(AAN) Ayera anochi den Bestuurskantoor na Noord, sindicato FTA y WAB a firma un acuerdo di principio pa 7or anochi, y asina tambe poniendo un fin na e accionnan den mundo di construccion di Aruba.

A yega acuerdo riba sueldonan minimo. Lo abusta e sueldonan minimo di e CAO di 1984 cu 70 por ciento e aña aki y cu 30 por ciento for di Januari 1 otro aña.

A yega na un acuerdo riba compensacion pa vacacion y gratificacion pa Pasco, tambe riba compra di zapatonan di seguridad.

Di esaki, e empleado lo paga 90 por ciento y dunador di trabao 10 por ciento, pero e empleado lo ricibi un adelanto pa compra e zapatonan.

Tambe a yega na acuerdo riba sueldo di trabao pa Diasabra. Trahamento riba Diasabra lo ser compensa cu un aumento pa ora di 75 por ciento e aña aki y otro aña cu 100 por ciento.

Lo bini aumento den e escalanan di sueldo basa riba un promedio di sueldo di 7,12 florin pa ora.

Entrante Januari e aña aki e aumento lo ta cu 5 1/2 por ciento, Januari 1990 cu 2 por ciento,

Juli 1990 cu 1 por ciento, Januari 1991 cu 1 por ciento y Juli 1991 cu 1 por ciento.

Aseguro lo ser firma despues di deliberacion entre dunadornan di trabao, trahadornan, agentenan di aseguro y compania di aseguro. Lo introduci un sistema di pas of di garantia.

Entrante prome di Maart of pa mas tarda prome di April lo tene aden 50 por ciento di e prima di aseguro. Dia prome di Januari lo tene aden 100 por ciento di e prima di aseguro, for di salario di e trahador.

Prima pa aseguro di desgracia y bida lo ser carga pa e trahador basa riba cifranan nobo di aseguro.

Esaki lo ta 40 mil florin si fallece pa motivo di desgracia y 80 mil florin si e trahador keda invalido.

E suma di seguro di bida lo ser mantene en principio riba 3 mil florin.

Si gobierno introduci un aseguro general, esaki lo reemplaza e aseguro menciona ariba.

E contrato colectivo di trabao ta wordo cera pa periodo di 3 aña retroactivo entrante prome di Januari 1989 y lo keda na vigor te cu 31 di December 1991.

Cas a kima por completo na Zeewijk

ORANJESTAD(AAN) -- Unidannan di bombero a sali cu urgencia pa un cas situa na Zeewijk 38 cu tabata na candela.

E patruya di Polis cu a yega na e sitio a constata cu e cas tabata completamente bao candela.

A pesar di esaki, personal di

bombero a logra domina e candela.

Despues di un investigacion, Polis a haya sa ta ken tabata e doño.

No a dura mucho cu a localiza e doño M.M.(51) kende a enfatisa cu e promer cu el a bandona e cas el a paga e lampi di kerozine.

Durante interrogacion el a segura e miembronan di Recherche cu el a paga e lampi.

Un investigacion cu a tuma lugar a indica cu posiblemente causa di e incendio ta cu M.M. aparentemente no a paga a lampi di kerozine bon.

E caso ta bao investigacion.

Plaza G.F. Betico Croes lo bira Plaza Libertador G.F. Betico Croes

ORANJESTAD(AAN) -- Gobierno di Aruba den reunion di congreso di Ministro di dia 21 di Februari a tuma e decision pa cambia e nomber di Plaza G.F. Betico Croes, den Plaza Libertador G.F. Betico Croes.

Esaki ta un deseo grandi cu desde morto di e gran lider Betico Croes q.e.p.d. tabata reina den e pueblo.

Como lider di fraccion di M.E.P., sr. Nelson Oduber dia 30 di November 1986, despues di fallecimiento di Betico Croes, a entrega un mocion de nomber di e pueblo pa cambia nomber di e plaza, den Plaza Libertador G.F. Betico Croes.

Gobierno di e tempo ey no a bay di acuerdo cu e nomber, y awe Gobierno a percura pa e difunto lider haya su honor mereci.

Tambe ta asina cu Gobierno a tuma un decision pa coopera den tur forma cu e Fundacion betico Croes, y a encarga D.O.W. pa asisti tal fundacion den e preparacionnan necesario en conexion cu desvelo di e estatua.

Di e forma aki Gobierno ta duna aprecio y merito pa un gran yiu di tera, kende a percura pa e Status Aparte di Aruba.